



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fatschendas:

Fuormaziun dal Stradun

Il cussagl cumünal ha discus üna futura fuormaziun dal Stradun, quai a man dal concept elavurà d'ün planisader specialisà. Id es previs da dar daplü spazi als peduns e da fuormar la via uschè ch'ella invida dad ir a spass sco eir da's tratgnair e s'inscuntrar. Üna prüma decisiun importanta, eir in connex cullas lavuors da sanaziun actualas, es statta la larghezza da la surfatscha pel trafic motorisà. Il cussagl ha decis üna larghezza da 5.40 m. Pella fuormaziun propuona il planisader variantas cun differentas surtrattas. Per motivs da cuosts saraja però pussibel da realisar talas be in singuls lös, p.ex. pro l'entrada dal BES.

Hotel Belvédère, passagi suotterran

Pella colliaziun suotterrana tanter l'hotel Belvédère e la Chasa Nova dà il cumün ün dret da passagi suot il Stradun. Quel dret vala intant 50 ons, cun pussibilità da prolungaziun e vain indemnisà, dad üna vart cun üna pauschala, da tschella vart cun ün import per inconvenienzas (p.ex. cuosts implü per fabricar la chanelisaziun publica etc.). Il suotpassagi nu das-cha chaschunar ingüns cuosts al cumün, e per müdamaints constructivs o müdamaints d'adöver sto il cumün sco proprietari dal terrain adüna dar l'acconsentimaint.

Giubileum 100 ons Val Mingèr aint il Parc Naziunal Svizzer

Per festagiar quist anniversari sun previss surtuot duos arrandschamaints: Üna spassegiada dal punct il plü bass dal Parc (Clemgia) maina fin sül punct il plü ot (Piz Pisoc); quista spassegiada ha lö als 20 avuost 2011. Plünavant vain "battiada" üna nouva spezcha da furmia scuverta avant pacs ons in Val Mingèr, quai in occasiun d'ün arrandschamaint als 16 settember 2011 aint il local da cultura dal BES.

Surdattas da lavuors

Punt Lischana

- Puntinada: Lawil Gerüste AG, Thusis

Sanaziun dal Stradun (@center fin Coop)

- Surtratta provisorica in asfalt: ARGE Engiadina (HEW-Palatini), Zernez
- Lavuors sanitarias (provedimaint d'aua e d'aua minerala):
Guido Christoffel, Scuol
- Sgüranza da fabrica: AXA Winterthur, Scuol

Attach Prà da Bügl

- Furniziun e montascha da pumpas per aua/chanalisaziun: Stecher AG, Scuol
- Furniziun e montascha da Moloks: Entsorgungstechnik AG, Dietikon

Mür da sustegn lung la via da Chantröven

- Lavuors d'indschegner: Peter Brem SA, Scuol

Dumondas da fabrica

Il cussagl resp. la direcziun han dat ils seguaints permiss da fabrica:

- Jürg Arquint: renovaziun e müdamaints interns da la chasa 115 in Funtanatscha
- Hotel Belvédère: nouv'entrada e renovaziun da stanzas
- Martha Gantner: piazza da parcar per 7 autos sün parcella 349 in Schombrina Sura
- Fränzi Gissler + Lukas Barth: renovar la chasa e fabricar oura il tablà sün parcella 466 giò Punt
- Arnica Scuol AG: proget Dschember (nouv stabilimaint per l'hotel)
- Credit Suisse AG: müdamaints interns da la banca / provisorì d'urant il temp da fabrica
- Michel Taisch + Leah Rosenast: renovaziuns e sanaziun energetica da la chasa nr. 131A in Dualatsch
- Reto Caviezel: chasa d'abitar sün parcella 542 in Rachögna
- Daniel Moll: 2 suosts per depositar laina sün parcella 2031 in Sotchà Dadora

sco eir per progets plü pitschens sco müdamaints interns, renovaziuns da tets e fatschadas, sondas geotermicas eop.